

2 PEDRO

É Kálara Beañ Apostol Pedro a ngá tsili

Mbóló

1 ¹Ma Simón Pedro, óloá ya ápostol Yesukristo:

Ma tsili mína é bot míní mana yaá ñɔŋ mbwínánn ó ne ya eban amvála ané bía, ébe é nzósoó é Nzamá wea ya Nkoro wea Yesukristo.

²Mvɔmm ya mvwaá bí vémŋe ébe mína, ébe nyemann Nzamá ya Ntí wea Yesus. ³É nguu Deñ é vé yaá bía mam mése á mfá éniŋ ya bébélá nyébé, ébe nyemann ye éñí a ngá lwée mína amú é dúmá ya biyágán bí mam Byeñ. ⁴Amú mam méte, a vé yaá bía mengaá má daŋ ya eban ya fe menén, á mfá ye ná mína, ya akála émo míní nzu yaá bɔ beñɔŋ ngap béye nswánn Nzamá fufúlu, á mfá ye ná míní sáale bembéa bé mam bé ne éniŋ dzí amú bembéa mikómánn.

⁵Ya amú ddam te, wulugán ya akéŋŋ áse, kɔglán á mbwínánn wenan esós, esós dá nyemann, ⁶nyemann wá ndzwéán nlém, ndzwéán nlém dá álaŋan, álaŋan dá bébélá nyébé, ⁷bébélá nyébé ñá edziŋŋ bɔbéñafwáa, edziŋŋ bɔbéñafwáa dá ñá edziŋŋ. ⁸Amú ná éyɔŋ mam méte mé ne ébe mína meé fwíge fe, mínáa ye bɔ bivovoba ngé ki kaa bibumá ébe nyemann Ntí wea Yesukristo. ⁹Amú ná é mot éé belé mam méte ébe émyen, a ne ndzindzím, áá yén ki oyaáp, a vwían yaá ntunán misémm myeñ míye ómvús.

¹⁰Ya ddam te, á bɔbédzaŋ, beragán daŋ bɔ akéŋŋ á mfá ye ná ékígá ya ntɔpbán wenan bí bɔ kaa áfógan; amú ná míní bɔ mam méte mínáa ye kɔp obaá amvála enziŋ. ¹¹Ya amú ná ddam te édo bá ye mína bíra vé ná míní ñíi édzwée ngómán mbéámbéa Ntí wea ya Nkoro wea Yesukristo.

¹²Édo ná, máa ye lík ná ma síman mína é mam má eyɔŋ ése, afáŋbɔ ná mína yem mɔ, míní yembe yaá fe ébe é bébélá a ne éndagá. ¹³Ve, é ne nzósoó ná ntéññ me ngén é ñúu ñí été, me suk mína osímánn,

¹⁴miníí yem ná avítsanj tám ma yian lík é ñúu dam amvála ané Ntí wea Yesukristo a lére yaá ma dɔ; ¹⁵éde, ma ma ye fe danj ádzénj á mfá ye ná, niané me ke yaá, míní síman é mam má eyɔɔj ése.

¹⁶Akála ná bíf ndzí mína lére é nguu ya áśś Ntí wea Yesukristo bíf belan ya ákénj mengann meduk, fáve ná bí tɔɔ béganíá bá yén ábímnnén Nzamá a ne. ¹⁷Amú ná niané a ngá ñɔɔ dúmá ya nganj ébe Nzamá Éséá, kíngj dá sɔ ñí á bora dúmá été, deé dzó ná: “Ndzindzingj Mwán wɔm éwɔ wí, éñí aa vé ma mesán á nlém.” ¹⁸Éde bía wók kíngj éñí é ngá sɔ á dzóp, é tám bí mbé á nkoó ó ne eki bíabe bɔ.

¹⁹Éde bí mbelé nkúlánn éfiá wá danj ya bébélá, éwɔ mína bɔ mvéáñ ná mína bɔ wɔ mewók, amvála ané é láma aa feań é vóm dzíbi é ne akekwiń ané kírfi da léne, ótétéń ya biléne bí kírfi wá ó kwíń fe mífém myenan été. ²⁰Táragán yem ná nkúlánn adzó enziɔ ye Mítsili ó sés éwí mot émyen aa kelan; ²¹amú ná nkúlánn adzó weé ndzí sɔ eyɔɔj enziɔ akála nkómánn mot, fáve ná mífúfúp mí bot Nzamá mí ngá kɔbɔ ya é nguu Mfúfúp Nsísim.

Békúlu medzó bábe báyágale bé ne mineá

2 ¹Ve, minéneá bekúlu medzó bá bé mbé énzénzanj áyɔɔj Israel, ntéńń mbɔɔ fe minéneá beyágale myá myá ye fe bɔ énzénzanj denan, ébɔ bá ye sɔ ya minéneá miyébé myá tsam áswéńń, atwaa béé kat Ndzwée a ngá kus bɔ, béé sɔ ya ntsamann weba bébyen avóó avóó. ²Édɔ ná abwińń bot dá ye bee nwulann tugá weba, ya akála ébɔ, é nzenn é ne bébélá bá ye dɔ byana. ³Éde, ya amú ónzánj akúmm weba, bá ye búán ya mína ya bífíá meduk; mfá bot béte, nkíkgán misanj weba atéé ye ókuá, ó sés enákne, ntsamann weba wá wéé bóo ki óyó.

⁴Amú ná ngé Nzamá eé ndzí dzɔɔ é baáńgel bé ngá bɔ misémm, ve aá wea bɔ ébéńń ndúán ya bekalamekéná á bidwá bí dzíbi été, béé baale bɔ mfá nkíkgán misanj, ⁵eé ndzí ki dzɔɔ bot béye éniɔj ókuá, éyɔɔj a ngá sɔ ya bora mvenj mfá éniɔj é bot báá kɔ ñí wɔɔj. Fáve, a ngá nii Noé nkat é fwéń é ne nzósoó, ya bot zangbéá befé. ⁶Ya fe bekísoan Sodoma ye Gomora a ngá vé bɔ meku, eé tsam bɔ, a lík bɔ asuúp ya asuúp, a téle bɔ ané ndem á mfá é bot bé ne kaa ákɔ Nzamá wɔɔj.

⁷Éde a ngá koro nzósoó mot Lot, éñí a ngá dzuk amú mbéa ntɔbán é bot bá niɔj á tugá été; ⁸amú ná nzósoó mot te, kada mos eé yén ya áwók, a tɔɔ énzénzanj deba été, é nzósoó nlém weń a ngá dzuk ya mitéń akála éniɔj ntsamann métsiɔj deba.

⁹Ve Ntí aa yem koro benzósoó bé bot mébóblé été, é bot bá bé ne bikúkwát bá aa baale mfá ávé bɔ mekira á mos ye á nkíkgán misanj, ¹⁰ádaɔɔj ébá bá wulu béé bee mikómánn mí mvin míye míson, béé byana fe edzwée. Bé ne aywá ya ábéle bébyen ó yóp, báá kɔ wɔɔj ná bá kɔbɔ menguu mé dúmá abé. ¹¹Éde, ñí a tɔɔ ná baáńgel ébá bá danj ya nguu ya biwólo, bá báá kíkf bɔ nsanj ó ne abé ósú Ntí.

¹²Ve bot béte bé ne ané betsít kaa kén, bé ngá byála ya nswánn tsít mfá ábiñ ya áywiñ bó, bá kóbo abé é mam báa yem, éde ná bá ye wú bé dzán amvála avós avós, ¹³bée dzuk ané ntán ye ékúkwát deba; bá sán éyɔɔ bá dzálá é mam bá wórán mvéáñ kada mos. Bé ne meyerɔɔ ya metwánn, bée sán méduk meba été, éyɔɔ bá dzémle mefét bídzí mínabe bó.

¹⁴Bé belé mís ndzálánn ya bibwan, báa vwat ki ya nsémm, bée dzén ná bé wún é bot bé ne ateák, bé belé milém ndzálánn ya onzánn akúmm; bé ne bwán béye bíboɔ. ¹⁵Bé lík yaá éniɔ e ne tételé bé lés, bée bee éniɔ Balaam é mwán Beor, éñí a ngá dziɔ ntán ye ékúkwát. ¹⁶Ve, bá vé ñí mbámm akála ntsamann métsiɔ weñ; mvúmvúk edzakás wá ó ɔga kóbo ya kíɔɔ é mot, ó ngá sim ákút nkúlu medzó.

¹⁷Bot béte bé ne mefóm kaa mendzím, ya míkút okos wá tsíni, á mfá weba édwá dzíbi dá daɔ dá yana bó. ¹⁸Amú ná bá dzén ná bé wún é bot bé ndem sáale, ébe é bot bá niɔ évuzá été, ya nzenn ye mbéa mikómánn míye míson ébe nwulann tugá, bée kóbo bifíá bí elan ya kaa eban. ¹⁹Bá kyaa bó filí, ve bébyen bá bé tós aloá ye mbéa éniɔ; amú ná mot a ne oloá ébe é mot á wún yaá ñí.

²⁰Amú niané bá mana sáale mam mé mvín méye éniɔ akála nyemann bá yem Ntí ya Nkoro wea Yesukristo, véa bé bera mana ke tsinibe mam méte été, bé wúnban yaá, éniɔ dzeba dá ye súgan ángónó álot edí ósúá. ²¹Amú é ngá daɔ bó ya mvéáñ ná bé bo kaa áyem nzenn e ne é nzósoó, ye ná, niané bá yem yaá do, véa bé dzogo ná bá bee mfúfúp mvéná bé ngá kee bó. ²²É dzam bébélá nkaná aa dzó é kwíñ yaá ébe bó ná,

“Mvú da búlán béndólo beñ émyen.

É ngéá ngwiññ a ne nsobán ñí aa bera ke ábíján á ntóp été.”

Ásós beañ Ntí

3 ¹Á míndzindziɔ myám, é kálara beañ, éñe má tsili mína ñí éndagá, á bé beañ béte, ya melépgá ma bo mína ná míní tém tételé, ²á mfá ye ná míní síman bifíá mitópbán bekúlu medzó bé ngá tára kóbo, ya fe é mvéná Ntí ya Nkoro wea, éñí é baapostol benan bé ngá kat mína.

³Táragán yem é dzam dí, ná melú méye ásúgánn bekpógo bot bá ye sós ya kpógo, bée wulu á mbéa mikómánn myeba été. ⁴Bée síli fe ná: “É ngáá ásós deñ e ne ó vé?” Amú ná atée ye betará bé ngá ke óyó [áwú] ya fe atée ye éniɔ é ngá téñban, dzam áse é ngén amvála avós ya avós.

⁵Amú ná bá vwían ya nkómánn weba ná dzóp é mbé atée ye ókuá, ya fe ná sí e ngá sós méndzím ya énzénzan mendzím, akála efíá Nzamá, ⁶ya efíá te fe, éniɔ é mbé tám te, é ngá ñíɔ ya mendzím é mana dzán. ⁷Ve, é dzóp ya sí bí ne éyɔɔ dí, bí ne mbaalann amú efíá evós ya evós, mfá é ndúán e ne ntélán á mos nkíkán misan ya ntsamann é bot báa ko Nzamá wɔɔɔ.

⁸Ve, á mindzindziŋ myám, míní táa vwían édí ná, mfá Ntí mos mbóó ó ne ané enzuk mibú, enzuk mibú dá ané mos mbóó. ⁹Ntí áá bem ná a dzálá é ngaá deñ, amvála ané bot benziŋ bé tém yaá ná aa bem, fáve ná a ne edzíp ya mína, éñe kaa ákómo ná mot enziŋ á dzáj, fáve ná bésebé nzu dzoban.

¹⁰Ve, é mos Ntí wá ye só amvála ané ndzídzip, mos te, dzóp dá ye mana ya mora eduŋŋ, ané byém byá ye ñem ya bora ayón, éde sí ya mibɔann mí ne été, byá ye dzík.

¹¹Éde, é tɔɔ ná byém bíte bise byá ye tsaman amvála te, nzá amvála bot mína yian bɔ, á ntɔbán eki, ya bébélá nyébé été, ¹²míní yana ya ovep á nlém mfá ásoó é mos Nzamá, akála mos te dzóp dá ye tɔbɔ ntsamann ya ndúán, ané é byém byá byá dzík byá ye ñem! ¹³Ve, amvála ané é ngaá deñ e né, bía yana mfefeñ dzóp ya mfefeñ sí, mévóm nzósoó a tɔɔ.

¹⁴Édo ná, á mindzindziŋ myám, míní yana mam méte, bɔgán akéŋŋ ná á koan ya mína á mvwaá été, kaa meyeŋŋ kaa ki ya bidzo.

¹⁵Éde símanján édzíp Ntí wea édo é ne akoroga, amvála ané ndzindziŋ mwadzaŋ wea Pablo ñí a ngá tsili fe mína, ya amvála fak bé vé yaá ñí, ¹⁶amvála te fe békálara béñ bése, eé kɔbɔ é mam má été, ébe ébɔ mam menziŋ mé ne ayéñ ye áwók, émɔ bedzími mam ya é bot bé ne ateák bá lés, ané bá viri fe Mítsili mivóó mfá ntsamann weba bébyen.

¹⁷Édo ná mína, á mindzindziŋ myám, míní tára yem dzaŋ te, mómɔŋán á mfá ye ná bé nza mína dulu évuzá mbéa bé bot, véa míní ku é vóm mína téle. ¹⁸Ve, míní vém á mvɔmm été ya á nyemann Ntí ya Nkoro wea Yesukristo. Éñe a ne ya dúmá éndagá ya akekwiñ mbéámbéa. Amén.